

## AGENDRE TRINITATIS 12 SEPTEMBER 2021

### 1. FANGOWAI BA FOGAONI

*(Tedöni dorosi , möi ndra sohalöwö bakha ba gosali, ba lahalö wangahono dödö banua niha Keriso ba wangondrasi ba ba wasumangeta khö Lowalangi).*

- Fangowai** :  
**SA** : Ya'ami banua Zo'aya, Ya somuso tödö ba sowuawua tödö ami ba we'amöi föna Keriso ma'ökhö andre. Ma'owai Ami fefu, : Ya'ahowu.  
**SATO** : Ya'ahowu !  
**SA** : Ya faofao khömi Lowalangi...  
**SATO** : Ya fao Khöu Geheha-Nia  
**Fogaoni** :  
**SA** : Da ta'owuawua'ö dödöda wangondrasi Yehowa, da ta'omusoi'ö dödöda ba wamalua fasumangeta khö Lowalangi. Tasuno Ia, manunö ita moroi ba Mbuku Zinunö **numero 8**

### 8. MANUNÖ ITA KHÖ YEHOWA

Lala : Khö-U, khö-U Yehowa Manunödo ( No. 7 )

do = bes 4/4  
MM = 96 - 104

1. Manunö ita khö Yehowa me no Ya'ia. Lowalangida.  
Lö ambö wa'abölöNia. Somasi Ia Ifalua sa.  
Ifa'aso lala wangorifi si möi fangatulö'ö zamati.
2. Nisuno Lowalangi Ama, si lö manehe na taya ita.  
No Ifatenge Nono-Nia, salahida ba huku horöda.  
Afu auri zamati khö-Nia, da'ö duho wa'omasi-Nia.

### 2. FANGA'ARO'Ö WA'OWULO (VOTUM)

- SA** : Da tahonogö dödöda ba wariawösa, ba ba wa hasambua khö Lowalangi, (Muzizio zato):  
No owulo ita ba da'e ba döi Lowalangi Ama, ba ba döi nono-Nia Yesu Keriso, ba ba döi Geheha Ni'amoni'ö. Fangorifida ha ba döi Yehowa si no momböi banua si yawa awö danö.....

**SATO** : YADUHU

- SA** : Ba u'ila Zo'aya, si dadao ba dadaoma sebua, si no alawa: anönö gosali ahe mbaru-Nia, önö gafi zamösana. Dua mbalubalu mbawa ba dua mbalubalu gahe ba dua ba Wehombo. Ba faoma lamane-mane we'ao khö nawöra: Ni'amoni'ö, Ni'amoni'ö, Ni'amoni'ö Yehowa ngahönö andrö; no anönö lakhömi-Nia guli danö ma'asagörö. HALELUYA.....

**SA** : **Manunö** : BZ. : 452

**Haleluya..... Haleluya..... Haleluya.....**

- SA** : Mangandrö ita :  
He Yehowa Lowalangi Ama, Ono ba Eheha Ni'amoni'ö. Möiga mangalulu ba wangandrö saohagölö me no Örorogö, Ö'orifi, ba Öbohouniga fa'omasi-Mö andrö. Ma'andrö khö-U, tohugö wa'ebua dödö-U khöma, rorogöga ba ngawalö de'ala, efa'öga ba wanandraigö, rara dödö bangawalö gabula dödö, tundrehehi faböi alau ndra'aga. Fatöröga ba zomasi Ndra'ugö irugi gamozua, fa makhamö nahia ba zi so Ya'ugö. Si lö mo'aetufa nisuna ba nifolakhömi Ndra'ugö, awö Zo,aya ya,aga Yesu Keriso ba Eheha Ni'amoni'ö, Yaduhu. (Mudadao zato)

### 3. MANUNÖ moroi ba Mbuku Zinunö Numero 229

**229. MA'ANDRÖ KHÖU**

do = g 4/4

MM = 96 - 104

1. Ma'andrö khöU, he Yesu, ro ngo wangandröma.  
Me oya wamaelungu, si möi fangalama.
2. Si te'ala ndra'aga, na lö fa'omasi-U.  
Andrö böi röi ndra'aga afu lö elungu..

**4. FOMBASO TAROMA LI LOWALANGI FAMÖRÖGÖ (AF)**

- : Da tafondrondrongo daroma Li Lowalangi, tehalö moroi ba zura **Amaedola 1:29-33**
29. Börö me no fatuwu khöra wa'aboto ba dödö, ba me lö nitehera fangata'ufi Yehowa.
  30. Lõ edõna ira mege wamolalagu tödõra, ba no la'ositengagõ wotu andrö khõgu, fefu.
  31. Andrö la'a dania lualua nitörõra andrö, ba abuso ira nikhoi dödõra andrö.
  32. Famunu zowõhõwõhõ andrö wanandrora, ba famakiko zambõ tödõ wa lö ba dödö andrö khöra.
  33. Ba ha niha zamondrongo khõgu, ba ahono ba danõ, ba lö abu dödõ; lö fa'ataunia wamakiko.

Simanö daroma Li Lowalangi, da tatema'ö faoma sinunö: BZ.Numero 20:1

**BZ. No: 20. MISUNOSUNO ZO'AYA**

1. Misunosuno Zo 'aya, mi bè zumange-Nia.  
Mi 'ebua 'ö döi-Nia, sotöi banua-Nia.  
Me no Ikaoni göi ami, afu mitemawa'au ri, khö Yesu, Sangorifi.

**5. FANGANDRÖ FANGEFA HORÖ**

**SA**

- : Ya'ami ira talifusö'  
Na tawa'ö lö horöda, ba talimo ita, ba siduhu lö'ö ba dödöda. Na ta'ombakha'ö Horöda, ba lö faröi Ia, ba no satulö Ia,fa'i'efa'ö khöda horö andrö, ihaogö ita, awö wa'iheta fefu zilö atulö. Andrö da möi ita föna Lowalangi si fao fangidengide'ö ba wangombakha horöda, (muzizio ita fefu)

**Mangandrö ita :**

He Yehowa Lowalangi, si lö ambö fa'abölö, ba si no fahöna fa'omasi. Mafaduhu'ö wa tenga sinangea ndra'aga tanö föna-Mö, me no fahöna höröma si no mafalua i'otarai iraono ndra'aga, he ba wehedema, era'era dödöma, awö gamuatama si lö faudu ba daroma Li-Mö. Andrö möiga khö-U ba wangandrö fa'ahakhö dödö-U, ena'ö Ö'efa'ö khöma horöma andrö si no mafalua, irege sohahau tödö ndra'aga wanohugö fekolima ba zi so fönama si faudu ba zomasi Ndra'ugö. Hakhösi dödö-U khöma Ama, ba be'e aefa khöma horöma andrö ma'afefu, Yaduhu.

**SATO**

- : Manunö : BZ. Numero 224 : 1

**224. NA'UBINI'Ö HORÖGU KHÖ YESU**

1. Na'ubini'ö horögu khö Yesu, ba lö usöndra za hono dödögu  
U'ombakha'ö ngawalö horögu, mo lala dödö.

- SA** : **Turia Wangefa horö** : “Utayaigö golalöwamö, si mane lawuo, awö horöu, si mane sau. Tema fuli’ö khö-Gu, me no U’orifi ndra’ugö.  
LAKHÖMI KHÖ LOWALANGI SI YAWA.....
- SATO** : Manunö:

### 450. BA FA’ATULÖ BA GULIDANÖ

1. Ba fa ’a tulö ba gulidanö ba niha ni’omasi ’ö andrö  
(mudadao zato)

#### 6. FOMBASO TAROMA LI LOWALANGI FÖNA HUHUUO (AB)

: Da tafondrondrongo daroma Li Lowalangi, tehalö moroi ba zura **II Korindro 1:12-14**

**12. Da’ö sa khöma, na masuno ndra’aga, wa ifaduhu’ö khöma tödöma, no ohauhau ndra’aga, wanörö lalama ba guli danö andre, ba mendrua manö ba khömi andrö, lö si fabaya hadia ia, ibe’e Lowalangi, tenga dali wa’atuatua nösi niha, dali wa’ebua dödü Lowalangi.**

**13. Lö’ö sa masura khömi mbö’önia, ha nibasomi andrö ba si no aboto ba dödümi; ba udönadöna aboto ba dödümi irugi gamozua;**

**14. si mane fa’aboto ba dödümi ösa ndra’aga, wa no böörö wanunomi ya’ami ndra’aga, si mane ya’ami khöma, na bawa Zo’aya ya’ita, Yesu.**

Ya’ahowu zamondrongo taroma li Lowalangi ba same’e ba dödü.

**SA+SATO** : Yaduhu

#### 7. FAMALUA HALÖWÖ NI’AMONI’Ö FAMAYAGÖ IDANÖ

#### 8. FASÖMBATA

**SA** : Iada’e tebe’e khöda ginötö ba wolohe fasömbata khö Lowalangi. Ta’osamuzaigö wame’e, he fasömbata si föföna, ba simanö göi zi mendrua awö zi medölu sifao fangowuloi fasömbata sanandrösa ba persembahan kasih. Ba si föföna ua da tafondrondrongo Li Lowalangi me imane:

❖ Same’e sumange fangandrö saohagölö, da’ö zamolakhömi Ya’odo, ba zi lö sinegu ba mbuabuania U’oroma’ö wangorifi andrö khö Lowalangi.

**SA** : Tafa’ema wasömbata khö Lowalangi, manunö ita moroi ba Mbuku Zinunö **Numero 259**

### 259. HE SO’AYA SANGORIFI NIHA <sup>1</sup>

do = bes 4/4

MM = 88 – 96

1. He So’aya sangorifi niha Sondrorogö fa’aurima.  
Mafa’ema khöU wasömbatama föfö mbualaMö khöma  
No buala si sökhi nibè Zo’aya ba zamati ba döi Nama.
2. Fahowu’ö fefu halöwöma gasagasa wekolima.  
Bè mo’ölö ba molualua, fefu gohitö dödüma.  
Ya tobali sumange ba fangebua Döi-Mö Keriso So’aya.
3. Dönisiga ba zorugo Ya’wa, naha nihonogöi Nama.  
Me ba da’ö sa mo’ahonoa, zana’ölö wasöndrata.  
Böi tebulö wamati ba fanötöna, irugi ba gamozua.

<sup>1</sup> Note : Tim Revisi Buku Zinunö BNKP 2009

*Na no awai la'owuloi/lafa'ema wasömbata, ba owulo tanö furi zangowuloi Fasömbata, lafendrongagö wolohe föna fasömbata, ba la'o'ö gofanöwa note zinunö ( irama lagu ).Fatua lö möi ira wolohe föna, ba imane Sangai Agendre:)*

“Da tafasao wasömbatada andre föna Lowalangi,.....Muzizio ita fefu.....  
Manunö ita moroi ba Mbuku Zinunö numero 261

## 261. YA'E ZUMANGE <sup>2</sup>

*Ira'alawe*□

1. Ya ' e zu-ma-nge fa-sömbata, ma ' o-he sumange Yehowa.

*Iramatua*

*Reff*

Ma'andrö khö-U fa-ho-wu'ö zu-mange ni 'o- hema khö-Mö

2. Ya'e zumange fasömbata mabe'e soroi ba dödöma.

*Reff*: Ma'andrö khö-U ....

3. Ya'e zumange fasömbata buala si'otarai Nama.

*Reff*: Ma'andrö khö-U ....

4. Ya'e zumange fasömbata, boto, noso, ba fa'aurima

*Reff*: Ma'andrö khö-U ....

5. Ya'e zumange fasömbata, lö irugi zomasi dödö-U.

*Reff*: Ma'andrö khö-U ....

6. Ya'e zumange fasömbata, ma'aohasi gölö Zo'aya.

*Reff*: Ma'andrö khö-U ....

**FANGANDRÖ** : *( Fangandrö nidönia'ö fasamösa zangowuloi fasömbata, aefa da'ö ba lafa'ema ba Danga zangai huhuo, itema'ö sangai huhuo awena itou'ö ba dete meza. Ba na so Wasömbata si sambua ni'öfulu, owasa wanaru ma owasavwamasi, btm ba itema'ö sangai huhuo si fao taroma Li Lowalangi si faudu ba wasömbata ni'owuloi andrö )*

### 9. KOOR/VOKAL GROUP

- SA** : Da tafaogö dödöda ba wanuno Lowalangi faoma sinunö ni'olohesi:  
Koor ba Vokal Group
- a. Koor Jemaat
  - b. Kegiata KOREMPA(Koor/Vokal Group)
  - c. Kegiata Komisi bapak (Koor/Vokal Group)
  - d. Kegiata Wilayah 1 (Koor/Vokal Group)
  - e.

### 10. MANUNÖ

- SA** : Da tafa'anö dödöda wamondrondrongo taroma Li Lowalangi, manunö ita moroi  
Ba Mbuku Zinunö **numero 163**

## 163. UHONOGÖ SIBAI DÖDÖGU

1. Uhonogö siba dödögu ba wamondrondrongo li Mö Yesu  
Mangalulu ndra'odo föna-U ba gametahö-Mö ia da 'a  
Öbayoini Eheha-U Yesu dozigö mbanua samati khö-U.  
Ubokai dödögu khö-U Yesu nahia daroma li-U.  
Taroma li-Mö lö fa'atebulö menewi ma 'ökhö ba si 'ogötö'ö lö sa mamalö.  
Taroma li-Mö si möi fangabölö utema 'ö soroi ba dödö, tolo ba wolo'ö.

### 11. HUHUUO SEBUA

- SH** : Ya'irorogö dödömi, awö gera'erami fa'ohahau dödö andrö, khö Lowalangi,  
Sabölö moroi ba gera'era niha fefu, ba khö Keriso Yesu. Mangandrö  
ita.....Yaduhu.
- a. Fombaso taroma Li Lowalangi (Mareko 8:31-38)
  - b. Fanuriaigö
  - c. Nitanö ba dödö. (Amaedola 1:33)
  - d. Fangandrö Fanga'aro'ö huhuo

**SATO** : Manunö : BZ. Numero 154 : 1

### 154. NO MAFONDRONDRONGO LIU <sup>3</sup>

1. No mafondrongo li-U, Lowalangi So ' aya.  
Tanö ba dödöma ia, fa böi olifuga.  
Fahowu 'ö ia khöma, ena ' ö ohahau dödöma fefu.  
Heta ba dödö zi lö sökhi, ma'o ' ö niwa 'ö-U.

#### 12. ANGOMBAKHATA BA MBANUA NIHA KERISO

13. **SA** : Da tafondrongo gangombakhata:.....

#### 14. MANUNÖ

**SA** : Manunö ita moroi ba Mbuku Zinunö **numero: 158**

### 158. HE SO'AYA TOLO

do = d 4/4

MM = 96 - 104

1. He So'aya, tolo, ebua'ödödö.  
Falemba höröU andrö, be'e khöma hagaMö.
2. Honogö dödögu, wolo'ö li-U, Yesu.  
Bayoinido Eheha-U, aro'ö wamatigu.

#### 15. FANGANDRÖ SALAHI + FAMATENGE + HOWUHOWU

**SH** : Muzizio ita fefu, mangandö ita :.....(tetohugö) : Ba döi Zo'aya ya'aga Yesu Keriso, Si no mamahaö ya'aga ba wangandrö mamane :

**SH + SATO** : He Ama khöma siso ba zorugo, ya te'amoni'ö döi-U. Ya tobali banua-U fefu niha, Ya itörö zomasi ndra'ugö, hulö ba zorugo, ya si manö göi ba gulidanö. Öma sirugi ma'ökhö be'e khöma ma'ökhö andre. Ba efa'ö khöma horöma, si mane fangefa'öma sala ba zi so sala khöma. Böi ohe ndra'aga ba wanandraigö, efa'öga ba zi lö sökhi. Me ya'ugö zamatörö banua-U, ba sokhö fa'abolö, awö lakhömi, irugi zi lö aetu. Yaduhu

**SH** : **FAMATENGE + HOWUHOWU** :  
Mi'angawuli si fao fa'ohahau dödö, ya tobali ami sura Keriso, samaduhu'ö Ya'Ia ba Lala wa'aurimi sero ma'ökhö, ba mitema (tatema) howuhowu Lowalangi :  
❖ Ya mufahowu'ö ami/ita Lowalangi, Ya murorogö ami/ita  
❖ Ya mufohaga mbawa-Nia Khömi/khöda, Ya mu'ebua'ö dödö-Nia khömi/Khöda  
❖ Ya mufalemba hörö-Nia khömi/khöda, Ya mube'e wa ohahau dödö khömi/khöda fefu. Yaduhu

**SATO** : Manunö BZ.Numero **291. MA'O'Ö NDRA'UGÖ, YESU**

**SH** : Ya'ahowu

**SATO** : YA'AHOWU